

Sigui cumpra nobo...., Cos ta bon na Aruba

Tin un guera di campaña, prijs, baratiyo, oferta special, etc. enz. formal, cu ta tumando lugar riba nos isla.

Esakinan ta varia di pizza, electronica, refresco, cerveza, celular, yega te na auto.

Cumpra un pizza aki, haya tal tamaño cu cierto cos acerca, ..pero bo no ta mira prijs.

Bo ta pensa riba cierto prijs, y ora bo encarga esaki, diripiente ta resulta cu e ta mas di 40 florin.

Pero un ta ofrece mas cu otro y awor ta inclui tambe refresco pa baha e pizza.

Hopi ta cay pa e "catch" nan aki, pero no ta mira con nan ta wordo "gara" pa gasta.

Den electronica por ripara con varios e negoshi ta ofrece tur cos electronico y prijs ta varia di un pa otro, pero ora cumpra bo no ta haya garantia di reparacion etc. of bo placa back, si e no funciona bon.

Placa bo no por haya back, pero si mester gasta e suma riba otro producto, ey nan mes.

Mester check nos leyman riba e asunto aki.

Mi a ripara cu un marca di refresco ta dedica su campaña riba hende muher y cu yen di premio, y mañan nos ta haya e otro ta dedica campaña riba muchanan, y otro ta bay dedica campaña riba babynan cu mester nace ainda.

Algo mester ta bay malo cu cumplimiento di refresco riba nos isla of e venta ta mihor cu nunca cu ta gradici clientenan cu un campaña.

Marcanan di cerveza tambe ta competi fuerte cu otro y toch na hopi caminda, ta mira con prijs ta varia di un lugar pa otro, di un establecimiento pa otro.

Cos mester ta bon den venta pasobra ta hopi placa ta ser hinca den promocion.

Pa celular, tin un campaña gigantesco na e momento aki entre un compania di gobierno y un compania priva.

Pober **SETAR** den su añanan di existencia a crea un imagen asina negativo bao di presion di politiconan, cu awor cu e ta un compania priva, **SETAR NV**, tratando di mehora e imagen lo mihor cu por, ta hayando competencia di un compania nobo cu ta hibando campaña formal cu awacero di placa pa gasta.

Pa fin di e aña aki nos lo sa con e situacion lo ta riba nos isla pa locual ta celular y servicionan y manera mi semper a bisa; nos ta prefera pa nos placa bay exterior, cu e keda Aruba y yuda nos economia.Ami ta accionista sigur di **SETAR**.

Agencianan di auto tambe ta pasando den un situacion di lucha.

Tur sorto di oferta tin awendia, pero nos ta lubida cu awendia no por cumpra auto mas na un agencia.

Bo tin cu busca e auto na e agencia y paga banco casi un biaha y mey mas cu e prijs di compra.

Cu banco, agencia ta ricibi e placa mes ora, pero si bo cumpra na e agencia, e agencia tin cu warda 3 te 5 aña pa bo caba di paga e auto. Nan ta prefera di laga banco kibra cabez cu bo, na lugar di yudabo bira propietario di un auto nobo.

Asina por sigui menciona di e "catch" nan cu tin actualmente.

Nos ta cumpra y cumpra numa, y mañan, ata banco riba nos cabez. Si no ta banco, ta incasso bureau. Sigui cumpra numa! Cos ta bon na Aruba!

PROME CU MI LUBIDA...PABIEN "VIC"

Den mi pida pida notanan, mi a topa cu number di Victor Pieters y fecha di awe.

Esaki a ponemi corda cu awe Victor Pieters ta cumpli 30 aña na Voz di Aruba. (esey no ta berdad Vic... ta mas o menos 31)

Mi ta corda con Victor cu sonrisa grandi na cara a yega y bisami, "awe mi ta **Discorama oficial**", pasobra el a wordo tuma permanente den servicio (despues di varios luna dirigiendo programa caba). Mi a bisa cu e por sigui oficial cu mi creacionnan, "**Discorama**" cu mi a hereda di otro locutor y mantene su popularidad den mi forma, y "**Turntable 64**" cu Victor a hereda di mi, y a cambia e cifranan pa otro añanan.

Victor, popular e tempo ey como cantante y participante den festivalnan, e ex Trupial converti den locutor y cu sigur tin 30 aña ta promove tur artista local.

Di mas recien ta dos actividad mi a protesta di no a keda contento cu e trato cu Victor a haya.

Algun aña pasa a dedica Concurso di Tumba di Carnaval na Victor, A anochi di Concurso, tur hende a lubida riba esaki.

Ni riba programacion e no tabata wordo menciona.. Na dado momento, mirando Victor mey mey di publico, mi a puntra Scorpio si e festival aki no tabata pa Victor. E ora ey "**casi na final**" nos a anuncia esaki toch, y ta e ora ey tur hende a corda.....pero....."**esey no ta manera di dedica festival**".

E otro tabata tambe durante carnaval. Tur dia Victor ta promove actividadnan di Carnaval oranan largo den su programanan. Riba dianan di calypso y tumba, tanto di mucha como hende grandi, of ora di eleccionnan, e ta dedica programa completo na esakinan.

Pero ora mira bon, carchinan ta wordo duna na emisoranan, pa cierto personahenan di programanan y ta lubida riba esnan cu ta promove e actividadnan **GRATUITAMENTE**.. Victor no por haya un carchi y tin cu paga pa drenta actividadnan pa su manise papia riba esaki.

Ora mira rond den stadionnan, yen di locutor y locutora ta haya, cu fuera di e actividad aki no ta dedica un palabra na Carnaval.

Victor, pabien cu e dia di awe, sperando cu bo oyentenan lo corda riba bo awe na cantidad grandi. Bo amigo fastioso.

E MOTIBONAN CU MI TA MASHA FASTIOSO

E señora a drenta e establecimiento y a encarga locual el a bin busca. E empleada latino no por a sigui loke e cliente kier, pasobra e no ta compronde e terminologia na ingles cu a ser usa, pero cu ta masha usual na Aruba.

E cliente e ora ey a puntra si e por papia cu un persona cu ta papia papiamento, esey no tabata por, pero si por papia cu supervisora.

E supervisora tampoco no por a yuda e cliente pasobra e cliente "**mester papia spaño, y splica kico e mester, na spaño**" y si e no por, e "**keda sin cumpra**".

E cliente a sali bon sara y a topa cu mi, cla pa drenta.

El a parami y a relata kico a caba di pasa cune.

Mi a dicidi di drenta puntra pa mes un producto, y a tende cu ta mihor mi splica e supervisora. Supervisora a yega, y mi a splike "**na papiamento**" kico mi kier, "**cu e terminologia ingles**," relaciona cu e producto. "**Papia spaño, y mi por compronde bo pedido**", el a bisami, cu un cara hala. Cu un "**muchas gracias**", mi a sali bay. Imaginabo, e lugar ta promove e producto cu uso di e "**terminologia ingles**" y eyden mes ningun hende no ta compronde loke bo kier, segun nan mes promocion.

Riba dje ta existi pa bo papia spaño.

E lugar ey no por haya mi bishita mas.

Mi ta e sorto di **cliente fastioso**, unda cu mi bay.

Si mi no gusta e servicio cu mi a haya, mi no ta drenta e lugar ey mas, o no ta haci uso di e servicio di e lugar ey mas, ni si mi mester paga mas caro otro caminda.

Si mi drenta un lugar y mira cu hefenan ta "**rous**" e trahadornan, mi ta sali bay y no bolbe eynan mas tampoco.

Y mi no ta tene boca cera tampoco, pasobra tur hende mi ta conta kico ta kico di tal lugar.

Si mi pasa den un disgusto cu un of otro establecimiento, aki tampoco no ta mirami como cliente mas, y esey ta e tipo di **cliente fastioso** cu mi ta.

Ora un establecimiento engañami, ta un cliente menos nan tin mes ora tambe.

Cliente semper mester ta rey, y ami como cliente kier wordo sirbi como rey pa e placa cu mi ta dispuesto pa gasta eyden.

Asina cu mi wordo trata na un manera inhusto, bo a dañami.

Kico ta haci anto cu politiconan? Nan tambe ta riba mi lista.

Si un politico mester engañami, bailami, of hunga wega politico cu mi, e por ta sigur cu esaki ta un voto perdi, sea cu mi a vota pe of no.

Si un politico resulta "**den mi bista**" como baliador di hende, y tur ora mi ta tende con e ta balia hende, y engaña hende, y tur ora ta e mes cosnan ta bin dilanti di tur banda, e tambe ta bay riba mi lista di "**no vote**".

Ora cu coordinadornan di ministro balia hende, engaña hende, hunga mas ministro cu ministro, y bo ta ripara cu ministro mes ta sostene nan, mi lista ta haya mas number tambe.

Tur politico sa cu "**mi no ta confia politico**", mi ta tolera y coopera cu tur relaciona cu mi trabao, sin laga mi pensamiento di no confia nan hunga un rol den esaki, pero un "**paso robez**"..., riba mi lista nan ta aparece mes ora, y mi no ta keda keto aki tampoco, pasobra mi boca ta pa mi expresa mi mes cu tur hende....

Pesey mi ta masha fastioso!

Juby Naar.